

## CONVENIO DE COLABORACIÓN ENTRE A AXENCIA DE TURISMO DE GALICIA E O CONCELLO DE MOS PARA A FASE I DO PROXECTO DE REMODELACIÓN DA CONTORNA DA IGREXA DE SAN MIGUEL DE PEREIRAS

Santiago de Compostela,

### REUNIDOS

Dunha parte, D. José Manuel Merelles Remy, director da Axencia de Turismo de Galicia, en virtude do nomeamento efectuado polo Decreto 75/2024, do 22 de abril (DOG núm. 81, do 24 de abril), e conforme ás facultades que lle confire o apartado dous da disposición adicional segunda do Decreto 135/2024, do 20 de maio, de estrutura orgánica dos órganos superiores e de dirección dependentes da Presidencia da Xunta de Galicia (DOG núm. 101, do 27 de maio), que desconcentra na titular da Dirección da Axencia a competencia para subscribir convenios de colaboración no seu respectivo ámbito competencial, de acordo co previsto no artigo 15.2.c) dos estatutos da Axencia de Turismo de Galicia, aprobados polo Decreto 196/2012, do 27 de setembro (DOG núm. 193, do 9 de outubro).

Pola outra, M<sup>a</sup> Nidia Arévalo Gómez, alcaldesa do concello de Mos no exercicio do seu cargo e ao abeiro das competencias que para vincularse neste acto se lle confiren na Lei reguladora das bases do réxime local, Lei 7/1985, do 2 de abril, e na Lei 5/1997, do 22 de xullo, de administración local de Galicia.

Interveñen en función dos seus respectivos cargos en exercicio das facultades que, para convir en nome das entidades que representan, teñen conferidas

### EXPOÑEN

**Primeiro.-** Que a Comunidade Autónoma de Galicia ten competencias, con carácter



exclusivo, tal e como se desprende do contido do seu Estatuto de Autonomía, en materia de promoción e ordenación do turismo dentro da comunidade (artigo 27.21).

Que tal e como establece a Lei 7/2011, do 27 de outubro, do turismo de Galicia, a Xunta de Galicia propiciará unha ordenación racional, equilibrada e sustentable dos recursos turísticos co obxectivo de garantir o equilibrio territorial e, para conseguir este fin, establecerá as pertinentes canles de cooperación con outras administracións tanto estatais como autonómicas e locais, así como co sector privado.

A Axencia de Turismo de Galicia é a entidade da Xunta de Galicia á que lle corresponde o exercicio, entre outras, das competencias en materia de ordenación, promoción, xestión e fomento do turismo.

A Axencia de Turismo de Galicia ten entre os seus obxectivos básicos levar a cabo accións de potenciación e desenvolvemento do turismo na Comunidade Autónoma de Galicia, como un factor de crecemento económico, polo que entre as súas prioridades está a de contribuír á realización de actuacións que impliquen conseguir este obxectivo.

Así mesmo, o artigo 9 dos seus estatutos establece as funcións e competencias da Axencia para acadar os seus obxectivos, dispoñendo na súa alínea i) que lle corresponde *"a dirección e coordinación das actuacións relacionadas coa posta en valor cultural e turístico do Camiño de Santiago, a súa promoción, a xestión da imaxe corporativa do Xacobeo e da rede de albergues, e o mantemento e conservación dos camiños e a súa sinalización, así como calquera outra acción que redunde en beneficio do Camiño de Santiago"*.

**Segundo.-** Que as entidades locais teñen atribuídas, a teor dos artigos 80 da Lei 5/1997, do 22 de xullo, de Administración local de Galicia e 25.2 h) da Lei 7/1985, do 2 de abril, reguladora das bases do réxime local, posto en relación coa Lei 7/2011, do 27 de outubro, do turismo de Galicia, competencias en materia de información e promoción da actividade turística de interese e ámbito local.

**Terceiro.-** Que entre as competencias que, no relativo ás relacións coas entidades locais galegas, lle corresponden á Xunta de Galicia, de acordo co disposto nos artigos 194 e 195



da Lei 7/1997, do 22 de xullo, de administración de Galicia, está a de cooperación e colaboración, as cales se poden levar a cabo mediante a formalización de convenios.

Para lograr esta finalidade a Xunta de Galicia, acomete, no ámbito das súas competencias, un decidido apoio ás iniciativas das entidades locais.

**Cuarto.-** Que a celebración do Ano Santo Xacobeo 2027 constituirá para a Comunidade Autónoma de Galicia unha nova oportunidade de potenciación de Galicia, así como de promoción e de reforzo da dimensión internacional do Camiño de Santiago e da propia comunidade.

O concello de Mos pretende acometer a fase I do acondicionamento e humanización da contorna da Igrexa de San Miguel de Pereiras. A Igrexa foi construída no ano 1788 segundo epígrafe que consta nun lateral do edificio que aparece delimitada por un pequeno valo que define o ámbito do adro parroquial. É un edificio de reducidas proporcións, totalmente executado en sillería granítica, que reponde ao modelo de planta basilical, con ábsida cuadrangular.

A totalidade do ámbito do proxecto encóntrase incluído na contorna de protección de elementos do catálogo de Patrimonio Cultural no que se inclúen elementos como a igrexa parroquial de San Miguel de Pereiras e o castro das Pereiras. Estas actuacións son a continuación á fase xa iniciada no ano 2025. Si ben na segunda fase as obras se centraron na zona do aparcamento de formigón nesta fase as obras céntranse na contorna do atrio da igrexa e de convivencia social.

Xerarase un espazo de convivencia veciñal con varios xardíns para que os visitantes e habitantes do municipio poidan desfrutar priorizando o uso peonil sobre o rodado.

O obxectivo do proxecto é levar a cabo a fase I da transformación da contorna da Igrexa de San Miguel de Pereiras nun espazo público de calidade con prioridade para os peóns, mellorando as condicións de accesibilidade.

Proponse unha plataforma única como solución idónea de convivencia entre o peón e o vehículo, desdibuxando os límites entre a zona de peóns e a zona de paso de vehículos, permitindo deste modo que os viandantes poidan apropiarse da zona de tránsito motorizado propio da contorna rural na que se intervén, conseguindo, desta maneira, un



espazo urbán accesible, plantexando unha redución da velocidade permitida de circulación a 30 Km/h mediante sinalización vertical de aceiro. Dentro deste concepto de plataforma única aplicado a todo o ámbito do proxecto, introdúcese matices de tratamento en función do tramo no que se intervén e as súas características particulares.

Na contorna do atrio da Igrexa, denominado Torreiro, resólvese a diferenza de cota entre a plataforma do cruceiro, o camiño de Pazos, e a parcela veciña, de ata 3,00 metros de altura no punto máis desfavorable, mediante un muro de contención de formigón que se proxecta coa fin de minimizar o seu impacto visual desde o vial e desde dita parcela, establecendo dous grandes parterres con pendente transversal, un deles situado a cota do Torreiro, cun banco corrido de formigón, con iluminación a base de tiras led e plantación de fresnos de gran porte e especies arbustivas. O segundo parterre situarase ao pé do muro de contención, con plantación de hedra coa fin de tupir o muro.

Este ámbito do Torreiro propónse de uso peonil cunha pavimentación a base de formigón pulido e posterior granallado en plataforma única limitando a circulación de vehículos ao vial camiño de Pazos. Deste modo, a totalidade da superficie deste ámbito do Torreiro plantéxase peonil e vinculada á igrexa, delimitando a zona de tránsito de vehículos ao camiño de Pazos, establecendo un filtro vexetal a base de plantación de arces de Montpellier en alcorques circulares.

Na marxe oeste deste ámbito proxéctase unha zona de estancia aproveitando o ensanchamento do vial que se produce á altura do local veciñal, cun parterre lineal con plantación de fresnos de gran porte, instalación de bancos de hormigón con iluminación oculta a base de tiras led e borde de zona de rodadura delimitada por alcorques circulares e arces de Montpellier iluminados con uplights.

Debido aos problemas de estabilidade do muro de sillería de granito que define o atrio da igrexa plantéxase a súa limpeza, picado de xuntas, rexuntado con mortero de cal e consolidación de sillares inestables.

Na zona Este do Torreiro proxéctase un espazo en plataforma única con tratamento de alameda, cunha superficie central a base de pavimento brando de xabre estabilizado.

Do mesmo xeito, no espazo do Torreiro situado máis ao sur, plantéxase unha zona de estancia mediante unha superficie de xabre estabilizado vinculada ao local parroquial, establecendo dous parterres perimetrais situados ao pé do muro pétreo do atrio da



igreja e ao pé do muro do cemiterio, coa fin de plantar arbolado de gran porte no primeiro e glicinias no segundo co obxectivo de tupilo e iluminalo con uplights.

No local parroquial prevese aillar e impermeabilizar a cuberta, instalando posteriormente unha nova envolvente en fachada e cuberta practicable a base de entablado de madeira de cedro, cunha rampa de acceso do mesmo material para salvar a diferenza de cota de 70 cm de xeito accesible.

Ademáis do pavimento a base de entablado de madeira de cedro substituirase a barandilla existente instalando unha nova barandilla de vidro, xenerando de este modo un mirador sobre o bosque do "penedo da cova" e sobre a parcela veciña, onde está previsto que se celebre a festa parroquial na honra a San Miguel de Pereiras. Proxéctase unha pérgola sobre dito mirador a base de estrutura tubular metálica e lamas de madeira de cedro con iluminación lineal led, coa fin de xerar unha zona de sombra sobre a zona de estancia descrita, aportando vexetación á mesma mediante plantación de glicinias no parterre previsto ao pé do muro do cemiterio.

Perimetralmente a este espacio central descrito, se proyectan unas jardineras lineales con plantación de arbolado de gran porte con uplights y balizas para la iluminación del mismo.

Na terceira e última fase do ámbito, consistente no vial público camiño de Pazos, que se executará salvo un pequeno tramo que se executou na fase 2, plantéxase unha plataforma única de 10 metros de ancho e tratamento de pavimento uniforme a base de formigón pulido e posterior granallado, limitando a circulación de vehículos neste ámbito unicamente ao corredor central de 6,00 metros de ancho en dobre sentido do mesmo material. A zona de rodadura delimitase a base de plantación de arcos de Montpellier en alcorques circulares e farolas lined con columna SVT de Setga.

**Quinto.-** A Estratexia de Turismo de Galicia 2030 ten como misión impulsar un turismo auténtico e sostible. Esta articúlase a través de misións, sendo unha delas a mobilidade, conectividade turística e reequilibrio territorial. Cómpre mellorar os investimentos no turismo rural, en especial para xerar sendeiros, percorridos e rutas tematizadas que discorran por estes territorios, pero tamén para manter o rico patrimonio histórico ou, con carácter xeral, xerar infraestruturas que melloren a experiencia turística. Prestarase



especial atención a crear oferta complementaria, cultural e de ocio, que faga aínda máis atractivos estas zonas e sirvan como detonante da viaxe.

A posta en valor das actividades que se desenvolven no medio rural e no litoral e a rehabilitación dos barrios históricos e da arquitectura tradicional completan esta medida.

O convenio de colaboración implica a concesión dunha subvención directa ao abeiro do disposto no artigo 19.4.c) da Lei 9/2007, do 13 de xuño, de subvencións de Galicia, por parte da Axencia de Turismo de Galicia.

A Axencia de Turismo de Galicia ten interese no impulso de políticas e accións de protección, ordenación e embelecemento do patrimonio de Galicia, co obxectivo de poñer en valor espazos urbanos e rurais e aproveitalos para facilitar ao sector turístico un contexto favorable para a creación de produto de alto valor engadido.

Este proxecto supón a posta en valor dos recursos turísticos do concello, o que tamén contribuirá á revalorización do turismo da Comunidade Autónoma e a necesidade de atender áreas con necesidades específicas, no lugar de Mos, para a mellora da calidade de vida da poboación; e a posta en valor e humanización do Camiño de Santiago de cara a celebración do Ano Santo Xacobeo, ofrecendo aos visitantes e peregrinos produtos turísticos seguros, que incidirán na promoción e potenciación do turismo en Galicia.

Estas melloras inciden na promoción e potenciación do turismo en Galicia, non sendo posible promover a concorrencia, por ser o concello a entidade impulsora da actuación.

Por todo o exposto acordan asinar este convenio de colaboración baseándose nas seguintes

## CLÁUSULAS

### **Primeira.- Obxecto do convenio.**



Constitúe o obxecto deste convenio establecer as bases de colaboración entre a Axencia de Turismo de Galicia e o Concello de Mos para a fase I do proxecto de remodelación da contorna da Igrexa de San Miguel de Pereiras.

### **Segunda.- Orzamento e financiamento.**

O orzamento estimado das actuacións previstas neste convenio é de 797.000,00 € (IVE incluído), co detalle que se establece no anexo a este convenio e do cal forma parte.

A Axencia de Turismo de Galicia, achegará 637.600,00 € (80%) con cargo á aplicación orzamentaria 04.A2.761A.760.0, proxecto 2015 00005, procedentes dos orzamentos xerais da Comunidade Autónoma de Galicia para as anualidades 2026 e 2027 co seguinte desagregamento:

Anualidade 2026: 374.626,69 €€

Anualidade 2027: 262.973,31 €

O resto do financiamento da actuación será asumido polo Concello de Mos con fondos propios.

Esta achega canalízase a través dunha subvención concedida polo procedemento de concesión directa de acordo co establecido nos artigos 19.4.c) e 26 da Lei 9/2007, do 13 de xuño, de subvencións de Galicia e 36.c) e 40 do seu Regulamento.

### **Terceira.- Gastos subvencionables.**

De acordo co previsto no artigo 29 da Lei 9/2007, do 13 de xuño, consideraranse subvencionables os gastos que, sen admitir dúbida, respondan á natureza da actividade subvencionada de acordo coa previsión de orzamento recollida na cláusula segunda e que se realicen a partir do **1 de xaneiro de 2026**. En ningún caso o custe de adquisición dos gastos subvencionables poderá ser superior ao valor de mercado.

Os gastos financeiros, os gastos de asesoría xurídica ou financeira, os gastos notariais e rexistrals e os gastos periciais para a realización do proxecto subvencionado recollidos



no artigo 29 da Lei 9/2007, do 13 de xuño, de subvencións de Galicia, non serán subvencionables.

#### **Cuarta.- Compromiso das partes.**

1. O Concello, como entidade beneficiaria da subvención, asume as seguintes obrigas:

- Desenvolver as actuacións recollidas nas cláusulas primeira e segunda deste convenio, e que constitúen o seu obxecto e xustificar a realización da actividade e o cumprimento da finalidade que determinou a concesión da subvención.

- Incluír en toda a documentación e soportes específicos para a actuación que se trata dunha actuación con financiamento da Xunta de Galicia a través da Axencia de Turismo de Galicia, incluír a marca Xacobeo 27 de conformidade co Decreto 3/2026, do 26 de xaneiro, polo que se regula a utilización da marca Xacobeo 2027, e a marca "Galicia Calidade" en todas as actividades obxecto do presente convenio de colaboración. Os logos poderán descargarse na seguinte ligazón: <https://www.turismo.gal/marca01>.

- Colocar un cartel de obra no que conste de xeito visible a colaboración da Xunta de Galicia de acordo co previsto no parágrafo anterior, conforme o modelo indicado no anexo II a este convenio, que deberá permanecer instalado durante todo o período de execución do proxecto. O cartel de obra deberá seguir as características que aparecen recollidas no manual de identidade para o cartel de obra xenérico que se poden ver no enlace que se xunta [https://www.xunta.gal/ficheiros/identidade-corporativa/2021/mic/xunta\\_de\\_galicia\\_manual\\_identidade\\_galego.pdf](https://www.xunta.gal/ficheiros/identidade-corporativa/2021/mic/xunta_de_galicia_manual_identidade_galego.pdf).

- Achegar a información que lle sexa requirida pola Intervención Xeral da Comunidade Autónoma, o Consello de Contas e o Tribunal de Contas no exercicio das súas funcións de fiscalización e control do destino da subvención.

- Comunicar á Axencia de Turismo de Galicia a obtención doutras subvencións, axudas, ingresos ou recursos que financien a actividade subvencionada procedentes de calquera administración ou entes públicos ou privados nacionais ou internacionais. Esta



comunicación deberá efectuarse tan pronto como se coñeza e, en todo caso, con anterioridade á xustificación da aplicación dos fondos recibidos.

- Presentar, antes da sinatura deste convenio, certificacións de atoparse ao corrente no cumprimento das obrigas tributarias e fronte á Seguridade Social e de non ter pendente de pago algunha outra débeda coa Administración pública da Comunidade Autónoma, así como unha declaración responsable de non estar incurso en ningunha das prohibicións para obter a condición de beneficiario, establecidas no artigo 10 da Lei 9/2007, do 13 de xuño, de subvencións de Galicia, de conformidade co disposto nos artigos 10 e 13 do Regulamento da dita lei, aprobado polo Decreto 11/2009, do 8 de xaneiro.

- Acreditar ante a Axencia de Turismo de Galicia o cumprimento do deber de remisión ao Consello de Contas das contas xerais de cada exercicio, conforme o indicado no artigo 4 e na disposición transitoria única do Decreto 193/2011, do 6 de outubro, polo que se regulan especialidades nas subvencións ás entidades locais galegas.

- Manter, de ser o caso, a propiedade sobre os investimentos subvencionados, e a vinculación destes á actividade económica que motivou a axuda, durante un período mínimo de 5 anos.

- Subministrar á Axencia de Turismo de Galicia, en virtude do disposto no artigo 4 da Lei 1/2016, do 18 de xaneiro, de transparencia e bo goberno, previo requirimento, toda a información necesaria para o cumprimento pola Axencia de Turismo de Galicia, das obrigas previstas no Título I da citada lei.

- Solicitar e obter os permisos e as autorizacións sectoriais pertinentes necesarias ante outros organismos ou administracións públicas, así como axustarse ás condicións establecidas nos devanditos permisos e autorizacións. A execución das ditas accións deberá realizarse de acordo coa normativa vixente, sen que se lle poida esixir á Axencia de Turismo de Galicia responsabilidade algunha directa nin subsidiaria que dos incumprimentos se puidesen derivar.

- As demais obrigas previstas no artigo 11 da Lei 9/2007, do 13 de xuño.



2. A Axencia de Turismo de Galicia comprométese a colaborar no financiamento do custe das actuacións previstas a través do outorgamento dunha subvención polo importe establecido na cláusula segunda.

#### **Quinta.- Compatibilidade.**

A achega económica prevista no presente instrumento será compatible con outras subvencións, ingresos, axudas ou recursos para a mesma finalidade, procedentes de calquera Administración ou entes públicos ou privados, nacionais, da Unión Europea ou organismos internacionais.

De conformidade co artigo 17.3 da Lei 9/2007, do 13 de xuño, o importe da subvención en ningún caso poderá ser de tal contía que, illadamente ou en concorrencia con outras subvencións, axudas, ingresos ou recursos, supere o custe da actividade subvencionada.

#### **Sexta.- Inexistencia de relación laboral.**

A subscrición do presente convenio non implicará relación laboral ou de calquera outra natureza entre a Axencia de Turismo de Galicia, e as persoas ou profesionais que desenvolvan as accións que constitúen o obxecto do mesmo, de xeito que non se lle poderá esixir responsabilidade algunha directa nin subsidiaria por actos ou feitos acaecidos no desenvolvemento deste.

#### **Sétima.- Subcontratación.**

Poderán ser obxecto de subcontratación, total ou parcial, as actividades subvencionadas a través deste convenio, tendo en conta o disposto nesta cláusula e de acordo co establecido no artigo 27 da Lei 9/2007, do 13 de xuño, de subvencións de Galicia. En todo caso quedan fóra da subcontratación aqueles gastos nos que teña que incurrir o Concello para a realización por si mesmo da actividade subvencionada.

A necesidade da subcontratación estará debidamente motivada pola entidade beneficiaria e, en ningún caso, suporá un aumento do custo da actividade subvencionada.



Os subcontratistas quedarán obrigados soamente ante o Concello, que asumirá a total responsabilidade da execución da actividade subvencionada fronte á administración. O organismo local será o responsable de que na execución da actividade subvencionada concertada con terceiros se respecten os límites establecidos neste convenio en canto á natureza e contía dos gastos subvencionables e esixiranlles ás/aos subcontratistas os documentos acreditativos dos pagamentos correspondentes.

Os/as subcontratistas están obrigados/as a facilitarlles aos organismos de auditoría e control toda a información necesaria relativa ás accións subcontratadas.

En ningún caso poderá concertar o beneficiario a execución total ou parcial das actividades subvencionadas con:

- a) Persoas ou entidades incursas nalgunha das prohibicións do artigo 10 da Lei 9/2007, do 13 de xuño, de subvencións de Galicia.
- b) Persoas ou entidades que percibisen outras subvencións para a realización da actividade obxecto de contratación.
- c) Intermediarios ou asesores nos que os pagamentos se definan como unha porcentaxe de custo total da operación, agás que o dito pagamento estea xustificado con referencia ao valor de mercado do traballo realizado ou dos servizos prestados.
- d) Persoas ou entidades vinculadas co beneficiario, agás que a contratación se realice de acordo coas condicións normais de mercado e que se obteña a previa autorización do órgano concedente nos termos que se fixen nestas bases reguladoras.

#### **Oitava.- Xustificación de fondos e pagamento.**

1. O Concello, segundo se establece no artigo 8 do Decreto 193/2011, do 6 de outubro, polo que se regulan especialidades nas subvencións á entidades locais galegas, estará obrigado a xustificar ante a Axencia de Turismo de Galicia o cumprimento da finalidade da subvención, a realización da actividade ou adopción do comportamento que fundamentou a súa concesión e o seu custo real, mediante a presentación dunha **conta**



**xustificativa** integrada, con carácter xeneral, pola documentación que se relaciona a continuación, e que incorporará, en todo caso, a certificación da intervención ou do órgano que teña atribuídas as facultades de control da toma de razón en contabilidade e do cumprimento da finalidade para a que foi concedida.

2. A xustificación da execución das actividades subvencionadas realizarase segundo a modalidade de conta xustificativa de acordo co disposto no artigo 10 do citado Decreto 193/2011, do 6 de outubro, para o que o concello deberá presentar:

a) Certificación expedida pola Secretaría da entidade local, co visto e prace do/a alcalde/sa ou presidente/a, relativa á aprobación polo órgano competente da conta xustificativa da subvención na que se faga constar, como mínimo, de forma detallada:

- O cumprimento da finalidade da subvención.

- Os distintos conceptos e contías correspondentes aos gastos totais soportados pola entidade beneficiaria imputables á actuación subvencionada coa seguinte relación: identificación do/a acredor/a, número de factura ou documento equivalente, certificación da obra, importe, data de emisión e data de recoñecemento da obriga polo órgano competente. Salvo disposición expresa das bases reguladoras, e sen prexuízo do previsto na letra c) deste mesmo artigo, non será esixible a remisión dos documentos relacionados no artigo 48.2.b) do Regulamento da Lei 9/2007, do 13 de xuño, de subvencións de Galicia, aprobado polo Decreto 11/2009, do 8 de xaneiro.

b) Certificado de taxador/a independente debidamente acreditado/a e inscrito/a no correspondente rexistro oficial, no caso de adquisición de bens inmobles.

c) Os documentos acreditativos dos gastos realizados con medios ou recursos propios e a indicación, no seu caso, dos criterios de repartición dos custos xerais e/ou indirectos incorporados na relación a que se fai referencia na letra a).

d) Unha relación detallada doutras subvencións, axudas, ingresos ou recursos que financien a actividade subvencionada procedentes de calquera administración ou entes



públicos ou privados nacionais ou internacionais, con indicación do importe e a súa procedencia.

e) De ser o caso, os tres presupostos que se esixen en aplicación do artigo 29.3 da Lei 9/2007, do 13 de xuño, de subvencións de Galicia.

Así mesmo, deberá achegarse polo Concello:

- Declaración responsable de atoparse ao corrente no cumprimento das obrigas tributarias e fronte á Seguridade Social e de non ter pendente de pago algunha outra débeda coa Administración pública da Comunidade Autónoma, así como unha declaración responsable de non estar incurso en ningunha das prohibicións para obter a condición de beneficiario, establecidas no artigo 10 da Lei 9/2007, do 13 de xuño, de subvencións de Galicia, de conformidade co disposto nos artigos 11 e 13 do regulamento da dita lei, aprobado polo Decreto 11/2009, do 8 de xaneiro.

- Detalle da documentación e soportes publicitarios aos que se refire a cláusula cuarta.

- Reportaxe fotográfica na que se constate o estado previo ao comezo das actuacións e o resultado final unha vez executadas as mesmas, así como a colocación do cartel de obra ao que se fai referencia na cláusula cuarta.

- Indicación do número de conta para o ingreso dos fondos e xuntar unha declaración responsable da veracidade dos datos relativos á dita conta.

3. De conformidade co artigo 12.3 do Decreto 193/2011, de 6 de outubro, polo que se regula especialidades nas subvencións ás entidades locais galegas, a contratación das obras ou equipamentos será realizada polo concello conforme á normativa vixente en materia de contratación do sector público, sendo o concello contratante o responsable directo das consecuencias que dos incumprimentos se puidera derivar.

4. Á vista desta documentación, o órgano competente da Axencia de Turismo de Galicia, comprobará a realización da actividade e o cumprimento da finalidade da subvención e,



unha vez comprobado o cumprimento, expedirá certificado acreditativo da verificación realizada e tramitará o pagamento.

5. A Axencia de Turismo de Galicia reservarase o dereito a solicitar toda a documentación que se considere precisa en relación coa xustificación do obxecto do presente convenio.

6. O prazo para presentar a documentación xustificativa da subvención e realizar a execución do obxecto do convenio por parte do Concello será dende a formalización do convenio ata o 15 de decembro de 2026 dos gastos causados no exercicio 2026. A esta xustificación poderán imputarse os gastos devindicados dende o 1 de xaneiro de 2026 ata esta data límite. O prazo máximo para presentar a documentación xustificativa da subvención e realizar a execución do obxecto do convenio por parte do Concello dos gastos causados no exercicio 2027 será o 15 de decembro de 2027. A esta xustificación poderán imputarse os gastos devindicados dende o 16 de decembro de 2026 ata esta data límite.

A documentación correspondente á xustificación presentarase de forma electrónica a través da sede electrónica da Xunta de Galicia (<http://sede.xunta.gal>).

Se o investimento xustificado fose menor ao previsto no orzamento estimado contido na cláusula segunda deste convenio e sempre que se cumpra coa finalidade para a que se concedeu a subvención, procederá o pagamento da subvención na contía que sexa obxecto de xustificación.

Non se entenderá incumplida a obriga de xustificación das actuacións obxecto deste convenio no caso de variacións das contías previstas nas distintas partidas establecidas no orzamento estimado na cláusula segunda, cando obedezan a razóns xustificadas e as actuacións que se levaran a cabo garden relación directa co obxecto do presente convenio e se compensen uns conceptos con outros, conforme ao previsto no artigo 74.2 do Regulamento da Lei 9/2007, do 13 de xuño, de subvencións de Galicia.

Ao abeiro do disposto no artigo 3 do Decreto 193/2011, do 6 de outubro: *"1. Con carácter xeral, considerarase gasto realizado cando se teña contabilizado o recoñecemento da obriga polo órgano competente da entidade local. As entidades locais beneficiarias estarán*



*obrigadas a acreditar documentalmente a efectividade dos pagamentos realizados no prazo máximo de sesenta días naturais contados a partir da data do ingreso na conta bancaria das beneficiarias de cada un dos aboamentos das subvencións concedidas.*

*2. Non obstante, no caso de realizarse pagamentos anticipados como financiamento necesario para poder levar a cabo as actuacións subvencionadas, considerase gasto realizado o que foi efectivamente pagado pola entidade local beneficiaria con anterioridade á finalización do período de xustificación determinado pola normativa reguladora da subvención”.*

### **Novena.- Pagamentos anticipados.**

Poderanse realizar pagamentos anticipados, que suporán entregas de fondos con carácter previo á xustificación, como financiamento necesario para levar a cabo as actuacións inherentes á subvención, por importe do 100% da subvención concedida, e sen que se supere a anualidade prevista en cada exercicio orzamentario, de conformidade co disposto no artigo 6.3 do Decreto 193/2011, do 6 de outubro, polo que se regulan especialidades nas subvencións ás entidades locais galegas, e no artigo 63.4 do regulamento da Lei 9/2007, do 13 de xuño, de subvencións de Galicia, aprobado polo Decreto 11/2009, do 8 de xaneiro.

Coa solicitude de anticipo, o concello terá que presentar certificacións ou declaración responsable de estar ao corrente no cumprimento das obrigas tributarias ou fronte á Seguridade Social e de non ter pendentes de pago algunha outra débeda coa Administración pública da Comunidade Autónoma. Así mesmo, debe xuntarse declaración responsable da obtención doutras subvencións, axudas, ingresos ou recursos que financien as actividades subvencionadas.

O anticipo da anualidade 2027 farase unha vez xustificado o libramento da anualidade 2026.



Conforme ao artigo 65.4.c) do Regulamento da Lei 9/2007, do 13 de xuño, de subvencións de Galicia, o Concello queda exonerado da constitución de garantía.

#### **Décima.- Perda do dereito ao cobramento da subvención.**

1. Producirase a perda do dereito ao cobramento da subvención nos supostos de falta de xustificación, xustificación incompleta ou insuficiente, deficiencias non emendables na documentación xustificativa, incumprimento das obrigas impostas á entidade beneficiaria neste convenio ou concorrencia dalgunha das causas previstas no artigo 33 da Lei de subvencións de Galicia e demais lexislación aplicable, sen prexuízo do previsto nos artigos 45.2 e 46 do Decreto 11/2009, do 8 de xaneiro.

2. Ademais de calquera outra causa que derive da normativa aplicable, constitúen en todo caso un incumprimento das obrigas impostas á entidade beneficiaria neste convenio as seguintes:

a) Non acreditar a execución do proxecto subvencionado antes da finalización do prazo de xustificación e/ou non presentar toda a documentación xustificativa no tempo e na forma esixibles, de conformidade co previsto nas cláusulas deste convenio e demais normativa de aplicación.

b) Incumprimento das condicións establecidas para a concesión da subvención.

3. A perda do dereito será total ou parcial, segundo afecte todas ou algunhas das actuacións que integran o proxecto que fundamenta a resolución de concesión.

#### **Décimo primeira.- Reintegro da subvención.**

Procederá o reintegro parcial ou total da subvención nos casos previstos no artigo 33 da Lei 9/2007, do 13 de xuño, de subvencións de Galicia e concordantes do Regulamento da Lei de subvencións de Galicia.

No caso de que se produza exceso das subvencións percibidas de distintas entidades públicas, o Concello deberá reintegrar o exceso xunto cos xuros de demora, nos termos que establece o artigo 23 do citado Regulamento.



**Décimo segunda.- Comisión de seguimento.**

Para o seguimento do convenio e da súa execución así como para propoñer solucións aos conflitos que poidan xurdir na aplicación e interpretación das cláusulas do convenio constituirase unha comisión de seguimento que estará integrada por un representante designado polo concello e por un representante designado pola Axencia de Turismo de Galicia.

A actuación da Comisión de Seguimento axustarase ao establecido nos preceptos básicos da Lei 40/2015, do 1 de outubro, de réxime xurídico do sector público, e na Lei 16/2010, do 17 decembro, de organización e funcionamento da administración xeral e do sector público autonómico de Galicia.

Non obstante, todas aquelas cuestións que se susciten en relación co outorgamento, cumprimento, xustificación e pagamento, así como o reintegro e determinación das posibles responsabilidades relativas á subvención concedida serán resoltas pola persoa titular da Dirección da Axencia de Turismo de Galicia.

**Décimo terceira.- Modificación do convenio.**

As modificacións do convenio adoptaranse por acordo expreso e escrito das partes asinantes, e de acordo cos trámites que esixa a normativa vixente.

Respecto da subvención concedida pola Axencia de Turismo de Galicia, toda alteración das condicións tidas en conta para a súa concesión dará lugar á modificación do convenio, sendo de aplicación das previsións ao respecto contidas na Lei 9/2007, do 13 de xuño, e no regulamento da dita lei.

Ao abeiro do disposto no artigo 7 do Decreto 193/2011, do 6 de outubro, o concello beneficiario da subvención deberá presentar a solicitude de modificación da subvención concedida cunha antelación mínima dun mes. A modificación deberá respectar o obxecto da subvención, as actividades subvencionadas e evitar actuacións deficientes ou incompletas. A solicitude deberá acompañar a documentación establecida no apartado 4 do citado artigo 7:



a) Memoria xustificativa, na cal ademais se faga constar que non se desvirtúa o proxecto subvencionado, que non suporá unha actuación deficiente e que se cumpre co obxectivo da resolución da concesión.

b) Orzamento ou proxecto modificado.

c) Relación e identificación concreta dos cambios introducidos en cadro comparativo.

#### **Décimo cuarta.- Causas de resolución.**

Serán causas de resolución deste convenio:

- O incumprimento do seu obxecto.
- O incumprimento total ou parcial de calquera das cláusulas que nel se establecen.
- O transcurso do tempo fixado sen que se executen e/ou xustifiquen as actuacións obxecto da subvención ou sen se ter acordado a súa prórroga.
- O acordo unánime de todos os asinantes.
- A decisión xudicial declarativa da nulidade do convenio.
- Calquera outra causa prevista nas leis.

#### **Décimo quinta.- Natureza xurídica, réxime xurídico e xurisdición competente.**

Este convenio ten natureza administrativa, e queda fóra do ámbito da Lei 9/2017, do 8 de novembro, de contratos do sector público, que os exclúe expresamente o artigo 6.1.

Seralle de aplicación o réxime determinado pola Lei 9/2007, do 13 de xuño, de subvencións de Galicia; o Decreto 11/2009, do 8 de xaneiro que a desenvolve; o Decreto 193/2011, de 6 de outubro, polo que se regulan especialidades nas subvencións ás entidades locais galegas; os preceptos básicos da Lei 38/2003, do 17 de novembro, xeral de subvencións, e do Real decreto 887/2006 que a desenvolve; a Lei 1/2016, do 18 de



xaneiro, de transparencia e bo goberno; a Lei 39/2015, do 1 de outubro, do procedemento administrativo común das administracións públicas; na Lei 40/2015, do 1 de outubro, de réxime xurídico do sector público, e polas demais normas de dereito administrativo aplicables e, no seu defecto, polas normas de dereito privado.

As controversias derivadas da aplicación ou interpretación do presente convenio serán resoltas en última instancia pola persoa titular da Dirección da Axencia de Turismo de Galicia, cuxas resolucións poñen fin a vía administrativa. Será competente a xurisdición contencioso-administrativa para resolver na vía xurisdiccional as citadas controversias.

**Décimo sexta.- Publicidade e rexistro do convenio. Consentimento para a publicidade de datos persoais que figuran no convenio.**

En cumprimento do disposto no artigos 18 e 20.8 da Lei 38/2003, do 17 de novembro, xeral de subvencións comunicárase a subscrición deste convenio á Base de Datos Nacional de Subvencións que opera como sistema nacional de publicidade de subvencións.

Segundo o artigo 17 da Lei 1/2016, do 18 de xaneiro, ademais da información que debe facerse pública segundo a normativa básica en materia de transparencia, a Axencia de Turismo de Galicia publicará o texto íntegro do convenio.

Así mesmo estarase ao disposto no artigo 15 da Lei 1/2016, do 18 de xaneiro, de transparencia e bo goberno, sobre as obrigas específicas de información sobre convenios.

Asemade procederase á inscrición do convenio no Rexistro Público de Subvencións conforme ao establecido no artigo 16 da Lei 9/2007, do 13 de xuño, e no Decreto 132/2006, do 27 de xullo.

Coa sinatura do presente convenio as partes asinantes prestan o seu consentimento para incluír e facer públicos a través do Portal de Transparencia e Goberno Aberto e do rexistro regulado no Decreto 132/2006, do 27 de xullo, os datos de carácter persoal e mailo resto das especificacións contidas no convenio.



**Décimo sétima.- Protección de datos persoais.**

As partes asinantes responsabilizaranse de que calquera tratamento de datos persoais que puideran levarse a cabo en virtude do mesmo se realice con absoluto respecto ás normas de seguridade e de conformidade co establecido no Regulamento 2016/679 (UE) Xeral de Protección de datos (en adiante, RXPD), na Lei Orgánica 3/2018, do 5 de decembro, de protección de datos persoais e garantía dos dereitos dixitais (en adiante, LOPDGDD) e demais normativa concordante.

Os datos persoais dos asinantes deste convenio serán tratados por cada unha das partes co fin de xestionar a súa formalización e desenvolvemento, sendo imprescindible para iso que inclúan os seus datos identificativos, a representación da capacidade que ostenten, e a súa sinatura. A base lexitimadora do tratamento dos datos persoais dos asinantes é o cumprimento dunha misión realizada en interese público baseada na Lei 40/2015, do 1 de outubro, de réxime xurídico do sector público e na necesidade de tratar os devanditos datos para a execución do convenio suscrito. Respecto dos datos persoais sobre os que a Axencia de Turismo de Galicia ostenta a condición de responsable do tratamento, as persoas interesadas poderán solicitar ante esta o acceso, rectificación e supresión, así como opoñerse ao seu tratamento a través da Sede Electrónica da Xunta de Galicia ou nos lugares e rexistros establecidos na normativa reguladora do procedemento administrativo común, segundo se recolle en <https://www.xunta.gal/exercicio-dos-dereitos>. Contacto co/a delegado/a de protección de datos e información adicional en <https://www.xunta.gal/informacion-xeral-proteccion-datos>.

En canto aos datos persoais sobre os que o concello ostenta a condición de responsable do tratamento, as persoas interesadas poderán solicitar da devandita entidade o acceso, rectificación e supresión dos seus datos, así como opoñerse ao seu tratamento a través do enderezo sinalado no encabezamento do presente convenio.

Así mesmo, as partes garanten o cumprimento do deber de información previsto no artigo 13 do RXPD respecto do persoal ao seu servizo, propio ou alleo, cuxos datos persoais sexan comunicados entre as partes para a execución dos seus compromisos.



**Décimo oitava.- Vixencia.**

Este convenio entrará en vigor na data da súa sinatura e terá vixencia ata o 31 de decembro de 2027.

**Décimo novena.- Notificación electrónica.**

Segundo o artigo 14.2 da Lei 39/2015, do 1 de outubro, do procedemento administrativo común das administracións públicas, os colectivos que están obrigados a relacionarse a través de medios electrónicos coas administracións públicas, e polo tanto, a recibir notificacións por canles electrónicas son: as persoas xurídicas, as entidades sen personalidade xurídica, os colexios profesionais, os que representen un interesado que estea obrigado a relacionarse electronicamente coa Administración e, os empregados das administracións públicas para os trámites que realicen con elas por razón da súa condición de empregado público.

As notificacións realizaranse só por medios electrónicos a través do Sistema de Notificación Electrónica de Galicia Notifica.gal (<https://notifica.xunta.gal>). Para poder acceder a unha notificación electrónica, o interesado deberá contar cun certificado electrónico asociado ao NIF que figure como destinatario da notificación (persoa física ou xurídica). Así mesmo, o interesado pode autorizar a calquera outra persoa a acceder ao contido das súas notificacións.

E en proba de conformidade de canto antecede, asinan este documento na data da súa sinatura dixital.

O director de Turismo de Galicia

José Manuel Merelles Remy

A alcaldesa do Concello de Mos

Nidia Arévalo Gómez



**ANEXO I**

UNIDADES DE OBRA	Anualidade 2026	Anualidade 2027	Total
Traballos previos e demolicións	32.418,42 €	-	32.418,42 €
Preparación do terreo. Movementos de terras e estrutura	66.146,26 €	-	66.146,26 €
Canteiría		2.164,27 €	2.164,27 €
Cubertas		28.047,40 €	28.047,40 €
Pavimentación	57.379,33 €	28.686,66 €	86.065,99 €
Instalacións	159.634,99 €	79.817,48 €	239.452,47 €
Xardinería		23.071,56 €	23.071,56 €
Equipamento, mobiliario e sinalización		61.683,79 €	61.683,79 €
Seguridade e saúde	5.535,12 €	2.767,54 €	8.302,66 €
Xestión de residuos	4.105,24 €	2.052,60 €	6.157,84 €
<b>TOTAL EXECUCIÓN MATERIAL</b>	<b>325.219,36 €</b>	<b>228.291,30 €</b>	<b>553.510,66 €</b>
13% Gastos Xerais	42.278,52 €	29.677,87 €	71.956,39 €
6% Beneficio Industrial	19.513,16 €	13.697,48 €	33.210,64 €
<b>TOTAL ORZAMENTO CONTRATA (SEN IVE)</b>	<b>387.011,04 €</b>	<b>271.666,65 €</b>	<b>658.677,69 €</b>
21 % IVE	81.272,32 €	57.050,00 €	138.322,31 €
<b>TOTAL ORZAMENTO LICITACIÓN (CON IVE)</b>	<b>468.283,36 €</b>	<b>328.716,64 €</b>	<b>797.000,00 €</b>



ANEXO II

 XUNTA  
DE GALICIA

CONVENIO DE COLABORACIÓN  
COA AXENCIA TURISMO DE  
GALICIA XXXXXXXXXXXXXXXXXXXX

Orzamento: X.XXX.XXX,XX €  
Subvención: XXX.XXX,XX €

Xacobeo  2027

Logo   Logo

